

La Coprativa de Sèn Jan no padesc la crisa

L'an 2010 se à serà su con n ùtol de passa mez milion de euro. L Cda tol sù n nef comember

Poza - Se à serà sù con bon ejit l'ejercizie 2009 – 2010 per la Coprativa de Sèn Jan, che à registrà n ùtol net de 527.231 euro, en linia con l resultat del 2009, renforzan la struttura patrimonièla de la sozietà. Enceben duta la scomenzadives che l'é stat metù en esser per miorèr più che l'é meso



L Pest Fascia l'é jit a l'Istitut d'Èrt e a la mem...

la proponetes per i sozi, con ofertes, rebasc, promoziomspezifiches e i tempes senestres che sion dò che vivon – l'é stat sottrissà da man del president Milio Gross e del diretor Luca Giongo – la coprativa à tegnù, se desmostran na realtà sèna e forta.

I dac porté dant dal vizediretor Giovanni Defrancesco ai 415 sozi prejenc (che i portèa ence 86 déleghes) moscia che l faturat generèl é cresciù de béleche l 3%, l faturat del supermercià del 6%, chel de l'extra-alimentèr del 2,54%, chel de l'engros de passa l 4%, béleche no mudà l resultat de la filiales con demò n 0,30% demanco.

Manco ben la é jita per l faturat de l'Eurospin che l'é jit endò de passa l 4%, chest podessa vegnir interpretà desche n segnèl de la crisa che à tocià duc ence a nivel naziònèl. Ge vel seghitar a far investimenc e mioramenc - l'à dit l president Gross – defat aon comprà da chi de Ciascian n teren de 3.300 metres cadres per smaorar l piazz dai auti del supermercià, aon dezidù de far fora la filiala de Soraga e proponet de logar n Bancomat via Pera ades che la Raiffeisenkasse à serà so portel. Tant l president che l diretor à volù ge dir n gran detelpai a sia squadra de lurier, i 100 colaboradores che laora te coprativa e sia filiales, recognoscian che l bon resultat é stat arjont ence de gra a la capacitèdes di dependenc.

Béleche 354.000 euro de retorn sul teritorie. L diretor Luca Giongo à dat cont del bilanz sozièl, de gran emportanza per la finalitèdes mutualistiches de la Coprativa: béleche 354.000 euro é jic de retorn sul teritorie, de chisc passa 260.000 euro sot forma de rebasc ai sozi (a front de na speisa de passa 3 milions de euro i sozi à ciapà l'8,45%, mez pont de più che l'an passà) e 52 milions desche sponsorisazioms e contribuc a soziazioms e gropes, chel che resta ge é jit al moviment cooperativistich trentin.

Se podon sponsorisèr sacotanta scomenzadives te val l'é percheche sozi e clienc vegn a spener si scioldi da nos. L'economia resta chiò te Fascia e donca ence la ressorses, enveze i scioldi de la concorenza i rua a Trent – l'à dit Giongo.

L'Consej de Amministrazion aur a n nef comemberLa radunanza à aproà l smaorament del consei de amministrazion da 11 a 12 comembres: l'é stat deschiari che per motives leé a la evoluzion sozièla de la coprativa, che anchecondi regoi sozi ence ti etres paijes de la val e enscinamai fora Neva, l'é stat valutà l besegn de tor ite tel cda n soget che no fèsc pèrt del teritorie storich, che fossa Poza, Pera, Vich, Mazin e Soraga. La radunanza à dezidù che l nef comember del cda sie Norbert Bernard da Pera, con 178 stimes. L'é stat ence renovà l Cda: te la composizion del consei demò na neva: per Vich l'é stat lità con 130 stimes Marco Rasom, ruà al post de Albert Obletter, che no se à più metù a la leta dò esser stat per 19 egn ite te consei. Conferma piena per l president Milio Gross che à concostà ben 330 stimes. Vèlch polemica é stata uzèda fora percheche l'é stat mudà la composizion teritorièla del consei con n conseier demanco per Pera, che da doi passa a un e un de più per Poza, da trei a cater: Gross à sturtà sù l'argument dijan de esser ben desponìbol a lascèr l post se l'é zachei a la leta, l problem – l'à dit – l'é che se fasc semper na gran fadia a troar zachei che se candide. Conferma ence per l raprezentant de Mazin, Livio Depaul e de Soraga, Maria Ghetta. L Pest Fascia a la memoria de Toni Gross.

L'apuntament anuèl coi sozi l'é stat ence l'ocajion per dèr sù l Pest Fascia, ruà a sia 17^a edizion. Chest pest é nasciù desche segn de recognosciment envers personajes o realtèdes che se dèsc jù per la comunanza e sie svilup. Chest an l recognosciment ge é jit a l'Istitut d'Èrt "Bepin Soraperra" e a la memoria del scultor e alpinist Toni Gross, che de l'Istitut l'é stat dant insegnant e dò preside. La Sorastanta Mirella Florian à palesà gran sodesfazion per chesta cernuda sottrissan l valor positif del leam anter la scola e la Coprativa. La vedova de Toni Gross, Teresa, compagnèda dal fi Damiano, à ciapà con no pecia emozion la carateristica scultura con la feures fascènes zipièdes.

L'atenzion per l'ambient a testamonech del bon resultat de ejercizie i sozi prejenc à ciapà desche don na bolga da durèr per l proveder piena e rèsa de magnadiva Coop, con ite ence na casseta de plastica che se pel fèr sù, ùtola magari da tegnir te auto per l trasport de la magnadiva. N don che palesa l'atenzion per l'ambient che la Coprativa é dò che porta inant travers desvaliva scomenzadives, desche i distributores per i detersives, l vin e l lat, la दौरa de bolghes ecologiches oramai da n trat, n empegn che la Provinzia à recognosciù con l'assegnazion del bolin "Ecoacquisti Trentino".

Per chel che revèrda l distributor de lat l'é stat dit che no l vegn durà descheche se se aessa spetà: fosc la scritta che consea de boir l lat dant de l beiver fera mìnjol chi che volessa l tor, ma se trata de n prodot soget dò a dò a controir rigorusc e donca deldut segur, no l'é neto nia da se cruzièr. (cri.m)